

आकाशवाणी

Script of Dogri Evening (NSD)

Bulletin 07-07-2026

खबरां सोनाली दत्ता कोला

- प्रधानमंत्री नरेंद्र मोदी होरें जर्काता च इंडोनेशिया दे राष्ट्रपति प्राबोवो सुबियानतो हुंदे कन्नै प्रतिनिधिमंडल स्तर दी गल्लबात कीती। महत्वपूर्ण खनिजें, प्रौद्योगिकियें, राईबाई ते समुंद्री सुरक्षा सने केई क्षेत्रें च समझौता पत्रें दी अदला-बदली कीती।
- प्रधानमंत्री श्री मोदी होरें'गी जर्काता च इंडोनेशिया दे सर्वोच्च सम्मान बिटांग आदिपूर्णा आफ दा रिपब्लिक आफ इंडोनेशिया कन्नै सम्मानित कीता गेआ।
- गुजरात उच्च न्यायालय नै 2008 दे अहमदाबाद च होए दे बम धमाके दे मामले च 38 दोषियें गी मौत दी सजा ते 11 दोषियें गी उम्र कैद दी सजा सनाई।
- राष्ट्रपति द्रोपदी मुर्मू होरें अज्ज नमीं दिली च डुरंड कप टूर्नामेंट 2026 दी ट्राफियें गी हरी झंडी दस्सियै रवाना कीता।
- दक्खन पच्छिम मानसून अगले 3 दिनें दरान गुजरात, हरियाणा, पंजाब ते राजस्थान दे किश हिस्सें च अगरे बधगा।
- ते मर्दे दे क्रिकेट च भारत दा मुकाबला अज्ज रातीं नाटिंघम दे ट्रेट ब्रिज च 5 मैचें दी श्रृंखला दे त्रीये टी-20 अंतरराष्ट्री मुकाबले दे मेजबान इंग्लैंड कन्नै होगा।

<><><><><><>

PM Modi Indonesia

प्रधानमंत्री नरेंद्र मोदी होरें अज्ज दपैहरी जर्काता च इंडोनेशिया दे संसद च संयुक्त सत्र गी संबोधित कीता। दौनें मुल्ले बशकार बदधी सांझेदारी पर लो पांदे होई श्री मोदी होरें आखेआ जे भारत ते

इंडोनेशिया दवें मुलखें कोल कई क्षेत्रें च सहयोग गी मजबूत करने दे केई सारे अवसर न। उनें आखेआ जे जदूं भारत ते इंडोनेशिया इक दुए कन्नै खडोते न ते ओह दुनिया दे विश्वास गी मजबूत करदे न जे लोकतंत्र अवसर पैदा करदा ऐ ते विश्वास जगांदा ऐ। प्रधानमंत्री होरें आखेआ जे जदूं भारत दे 140 करोड़ लोक ते इंडोनेशिया दे 29 करोड़ लोक रलियै प्रगति आली बक्खी बधांगन ते इतिहास रचेआ जाहग।

<><><><><><>

PM-Indonesia Parliament

प्रधानमंत्री नरेंद्र मोदी होरें जर्काता च इंडोनेशिया दे राष्ट्रपति प्रबोवो सुबियांतो हुंदे नै प्रतिनिधिमंडल स्तर दी गल्ल कीती तां जे दपक्खी सरबंध्यै दी पूरी चाल्ली समीक्षा कीती जाई सकै ते दैनें मुलखें बश्कार व्यापक रणनीतिक सांझेदारी गी नमीं गति दित्ती जाई सकै। दवें नेताएं दी उपस्थिति च आपसी हित दे क्षेत्रें च सहयोग बधाने दे मकसद कन्नै केई समझौता पत्रें दी अदला-बदली बी होई। जर्काता च इंडोनेशिया दे राष्ट्रपति प्राबोवो हुंदे कन्नै इक्क प्रेस कांफ्रेंस गी संबोधित करदे होई श्री मोदी होरें आखेआ जे बधदे आपसी विश्वास कन्नै रक्षा, सुरक्षा ते समुंद्री क्षेत्र च सहयोग गी मजबूत कीता गेआ ऐ ते दवें मुख्य रक्षा, आपदा प्रबंधन सहयोग ते उद्योगिक सहयोग दा विस्तार करने पर सहमत होई गे न ते इनें दौनें नेताएं, जर्काता च गल्लबात दे दुरान भारत-इंडोनेशिया व्यापक रणनीतिक सांझेदारी गी मजबूत करने दी अपनी बचनबद्धता दा परतियै जिक्र कीता। उनें रक्षा, महत्वपूर्ण खनिज, राईबाई, समुंद्री सहयोग ते उभा'रदियें प्रौद्योगिकियें सरबन्धी समझौता पत्रें पर हस्ताक्षर कीते। दवें नेता जर्काता च आईआईएम बेंगलोर दी इक शाखा स्थापित करने पर बी सहमत होए ते खाद्य सुरक्षा, डिजिटल टेकनालजी विनिर्माण च सहयोग गी मजबूत करने पर बी सहमति व्यक्त कीती। मोदी होरें इंडोनेशिया दे सर्वोच्च नागरिक सम्मान वित्तांग आदिपूर्णा कन्नै सम्मानित होने दे मगरा आभार व्यक्त कीता।

<><><><><><>

HM-Ek Ped Maa Ke Naam

केंद्री गृह मंत्री अमित शाह होरें अज्ज राश्ट्री राजधानी च हरियाली बधाने दे मकसद कन्नै एक पेड़ मां के नाम अभियान दे तैहत दिल्ली च 70 लक्ख बूहटे लाने दे मिशन दा शुभारम्भ कीता। इस मौके पर शाह होरें आखेआ के एहू अभियान दिल्ली दे पर्यावरण गी बदलने दी दिशा च इक महत्वपूर्ण गैहू ऐ। उनें आखेआ जे प्रधानमंत्री नरेंद्र मोदी होरें पर्यावरण संरक्षण गी बढ़ावा देने आस्तै एक पेड़ मां के नाम अभियान शुरू कीता हा। गृह मंत्री होरें आखेआ कि सरकार यमुना दरेआ गी साफ करने लेई लगातार जत्त करा'रदी ऐ। उनें आखेआ जे पिछले इक बरे च 129 सीवेज ट्रीटमेंट प्लांट शुरू होए न, जेह्दे कन्नै दरेआ उपचारित पानी दा प्रवाह सुनिश्चित होआ'रदा ऐ। शाह होरें सब्बै नागरिकें गी अपनी मां दे नां इक पौधा लाने दी अपील कीती।

<><><><><><>

HC-Ahmadabad Blasts

गुजरात हाई कोर्ट नै अज्ज 2008 दे अहमदाबाद च होए दे धमाकें दे मामले च बड्डा फैसला सनाया ऐ जेदे च 38 दोषियें गी मौत दी सजा ते 11 कैदियें गी उम्रकैद दित्ती गेई ऐ। कोर्ट नै दोषियें दी सब्भनें अपीलें गी खारिज करी दित्ता ऐ। 26 जुलाई 2008 गी अहमदाबाद च छड़े 70एं मिंटें दे अंदर 21 बम धमाके होए हे। इस हमले च 56 लोकें दी जान गेई ही ते 200 थमां मते लोक जखमी होए हे। हमलावरें शहर दे अस्पतालें गी निशाना बनाया हा। 2022 च इक विशेष अदालत नै 38 भारती मुजाहिद्दीन दे सदस्यें गी मौत दी सजा सनाई ही। अदालत नै बाकी 11 दोशियें गी बी उम्र कैद दी सजा सनाई ही।

<><><><><><>

Prez. Durand Trophies

राश्ट्रपति ट्रॉफी मुर्मू होरें अज्ज नमीं दिल्ली च इरंट कप 2026 टूर्नामेंट दी ट्रॉफियें दा अनावरण कीता ते उनेंगी हरी झंडी दस्सियै खाना कीता। अपने संबोधन च राश्ट्रपति होरें आखेआ जे इस बरे

डूरंड कप राश्ट्रपति कप ते शिमला ट्रॉफी दे चैंपियन बनने लेई नमीं टीमां प्रतियोगिता च हिस्सा लैडन। उनें इस बरे दे टूर्नामेंट च श्रीलंकाई टीम दे हिस्सा लैने पर खुशी जाहिर कीती। राश्ट्रपति नै टूर्नामेंट च हिस्सा लैने आहली सब्बै टीमें दे खडारिएं गी शुभकामनां दित्तियां। उनें खडारिएं गी खेल भावना द पालन करने ते सर्वश्रेष्ठ प्रदर्शन करियै इस ऐतिहासिक प्रतियोगिता दी प्रतिष्ठा गी होर बधाने दा आग्रह कीता। इस मौके पर चीफ आफ डिफेंस स्टाफ जनरल राजा सुब्रमणि, सेना प्रमुख धीरज सेठ ते नौसेना प्रमुख एडमिरल कृष्णा स्वामीनाथन बी मौजूद हे।

<><><><><><>

POJK-Protest

पाकिस्तान दे नजैज कब्जे आहले कश्मीर च बदधी राजनीतिक उथल-पुथल दे चलदे जम्मू-कश्मीर संयुक्त अवामी एक्शन कमेटी नै इस्लामाबाद सरकार गी 48 घंटें दी समें-सीमा दिती ऐ ते धमकी दिती ऐ जे जेकर उन्दियां मंगां पूरियां नैई होइयां तां 9 जुलाई गी ओह सख्त ते निर्णायक परता देडन। कमेटी नै इक औपचारिक घोषणा च आखेआ जे उन्दा मौजूदा धरना-प्रदर्शन उसलै तगर अन-मित्थे समें तगर जारी रहौग जिसले तगर उन्दियां सारियां मंगां पूरियां नैई होई जंदियां। कमेटी नै 9 जुलाई गी होने आहले विरोध प्रदर्शन च हिस्सा लैने लेई PoK दे रौहने आहलें ते कश्मीरी प्रवासी समुदाय दे सदस्यें दा आह्वान कीता ऐ। इस्लामाबाद आसेआ जारी कीती जा'रदी सख्त कारवाई ते पाकिस्तान दे नजैज कब्जे आहले जम्मू-कश्मीर च 600 थमां मते नागरिक अधिकार कारजकर्ताएं दी व्यापक गिरफ्तारी दे विरोध च प्रदर्शन करा'रदे लोकें पर पाकिस्तानी बले दीयां ज्यादातियां ऐतवारें थमां तेज होई गेइयां न। मुजफराबाद दे केई हिस्सें च गोलीबारी ते झड़फें दियां खबरां आवा रदियां न।

<><><><><><>

Amarnath Yatra

श्री अमरनाथ जी दी जात्तरा नै अज्ज इक बड्डी उपलबिध हासिल करी लैती ऐ कीजे सलाना तीर्थ जात्तरा दे 5में रोज पवित्तर गुफा च दर्शन आस्तै औने आहले श्रद्धालुएं दी गिनतरी 1 लक्ख दे आंकड़े गी पार करी गई ऐ। दपैहरी 3 बजे तगर 20 ज्हार 537 श्रद्धालुएं पवित्तर गुफा च दर्शन पूरे करी लैते दे हे। अज्जै दी गिनतरी कन्नै पैहले 5एं दिनें च पवित्तर गुफा च मत्था टेकने आहले श्रद्धालुएं दी कुल गिनतरी हुन 1 लक्ख 6 ज्हार 316 होई गई ऐ। जात्रुएं दी सुरक्षित ते आरामदायक जात्तरा लेई सब्बै लोड़चदे बंदोबस्त कीते गेदे न। अधिकारी जात्तरा पर नेड़मी तक्क रक्खा'रदे न ते इस गल्लै गी जकीनी बना'रदे न जे तीर्थ जात्तरा दौनें रस्तें पर सुचारू ढंगै कन्नै चलै। अपनी खुशी सांझा करदे होई किश रद्धालुएं आखेआ

<><><><><><>

ED-Kolkata

माली नियम कायदे लागू करने सरबंधी निदेशालय नै अज्ज संदिग्ध वित्तीय लैन-देन ते कोलकाता दे आले-दोआले माली हेराफेरी दे मामले च 5 परिसरें च तपाशी लैती। शुरूआती जांच च ई.डी नै खुलासा कीता ऐ जे तृणमूल कांग्रेस दे बैंक खातें च 150 करोड़ रपे शा मती धन राशि विमानन ते जात्तरा कंपनियें दे राएं संदिग्ध मकसदें लेई भेजी गेदी ऐ।

<><><><><><>

PIB-Fact Check

सरकार नै सोशल मीडिया पर प्रसारित उनें वीडियोज़ दा खंडन कीता ऐ जिंदे च झूठा दावा कीता गेआ ऐ जे चीनी सेना भारत च 60 किलोमीटर तगर अंदर आई गेदी ऐ। सरकार नै एह स्पष्ट कीता ऐ जे प्रसारित कीते जा'रदे वीडियोज़ पराने न ते इंदा भारत-चीन कन्नै कोई सरबंध नेई ऐ।

<><><><><><>

Hideout-Busted

अधिकारियों मंगलवार दस्सेआ जे सुरक्षाबलें कुपवाड़ा जिले च आतंकवादिएं दे इक ठिकाने दा पता लाइयै उसी तबाह करी दित्ता। ठिकानें थमां थेआर ते गोला-बरूद बरामद कीता गेआ ऐ। चिनार कोर नै सोशल मीडिया पर पोस्ट कीता ऐ जे इक खास खुफिया जानकारी दे आधार पर सेना नै सोमवारें केरल सैक्टर च तपाशी अभियान चलाया। अभियान दरान उनें इस ठिकाने दा फंडाफोड़ कीता ते 5 ए.के रफलां, 9 ए.के मैगजीनां, 1 हथगोला, बड़ी मती मात्रा च बारूद ते होर दुए फौजी समेयान बरामद कीते।

<><><><><><>

IMD-Weather

भारती मौसम विभाग दा आखना ऐ जे उत्तरी अरब सागर, गुजरात, पंजाब ते हरियाणा दे किश हिस्सें ते राजस्थान च अगले 3 दिनें दरान दक्खन पच्छिम बरसात दे अगड़े बधाने आले अनुकूल हालात बने दे ना। विभाग नै कर्नाटक दे समुंद्री इलाकें, गुजरात, कोंकण, गोवा ते महाराष्ट्र दे बश्कारले इलाकें च अज्ज भारी बरखा पौने दी पेशनगोई कीती ऐ। गुजरात दे बी बक्ख-बक्ख हिस्सें च खास करियै सौराष्ट्र ते दक्खनी गुजरात दे इलाकें ते वलसाद जिले दे वायी च बी खीरी 24एं घंटे च बदेबद् साडडे 8 इंच बरखा होई ऐ।

<><><><><><>

Cricket

मर्दे दे क्रिकेट च भारत दा मुकाबला अज्ज रातीं नाटिंघम दे ट्रेट बिज च 5 मैचें दी श्रृंखला ते त्रीए टी-20 अंतरराष्ट्री मैच दे मेजबान इंग्लैंड कन्ने होगा। एहू मैच भारती समे दे मताबक राती 10 बजे शुरू होगा। मेन इन ब्लू यानि भारती टीम श्रृंखला च बरोबरी करने दी कोशश करग कीजे नमें कप्तान श्रेयस अय्यर गी अपनी कप्तानी च पैहली जित्त दर्ज करनी होगी।

<><><><><><>

Keralam-Landslide

अज्ज केरलम च वायनाड टनल शिडक प्रोजेक्ट यानि सुरंग शिडक परियोजना दे निर्माण आहली थाहे पर जमीन दे खिसकने कनै इक्क व्यक्ति दी मौत होई गई ते 7 होर जखमी होई गए। एह्दे अलावा 7 होर लोक लापता दस्से जा'रदे न। केरलम राज्य आपदा प्रबंधन प्राधिकरण दा आखना ऐ जे एह् हादसा अदूं होआ जदूं वायनाड कल्लाडी सुरंग निर्माण आहली थाहर गी लेइये खुदाई दरान जमे दा मलबा लगातार होआ'रदी बरखा करी खल्ल खिसकी गेआ जेदे नै शिडक बंद होई गई।

<><><><><><>